



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

კაიროვი ვლადიმერ (ბალო) ზაურბეგის ძე

კაიროვი ვლადიმერ (ბალო) ზაურბეგის ძე [11. VI. 1913, არდონი (ჩრდ. ოსეთი), – 2004], ოსი მსახიობი. საქართვე. ხელოვნების დამს. მოღვაწე (1960). 1936–41 სწავლობდა ლენინგრადის ა. ოსტროვსკის სახ. თეატრ. ინ-ტში სამსახიობო განხრით. 1944 დაამთავრა მოსკოვის თეატრ. ინ-ტის სარეჟისორო ფაკ-ტი. 1930–38 თვითმოქმედ დრამატულ წრეებში დადგა 20-ზე მეტი სპექტაკლი, რ-ებშიც ხშირად თვითონვე ასრულებდა მთავარ როლებს.

1932 ბესლანში ჩამოაყალიბა დრამ. წრე. 1938–54 იყო ცხინვალის სახელმწ. თეატრის სამხატვრო ხელმძღვანელი, შემდეგ მუშაობდა ამავე თეატრის რეჟისორად. კ-ის მიერ სხვადასხვა დროს განსახიერებული როლებიდან აღსანიშნავია ედგარი (უ. შექსპირის „მეფე ლირი“), ხასანა (დ. მამსუროვის „ხასანა“), არსენა (ს. შანშიაშვილის „არსენა“), არკადი (ა. კორნეიჩუკის „პლატონ კრეჩეტი“), ფლორინდო (კ. გოლდონის „ორი ბატონის მსახური“), პარატოვი (ა. ოსტროვსკის „უმზითვო“), აკოფა (ა. ცაგარლის „ხანუმა“), კომანდორი (ლოპე დე ვეგას „ცხვრის წყარო“) და სხვ. კ. როგორც რეჟისორი ჩამოაყალიბდა ეროვნული სპექტაკლებით, რ-ებიც გამოირჩეოდა რომანტიკული თეატრისთვის ნიშანდობლივი მონუმენტურობით. მისი პირველი დადგმა განხორციელდა ცხინვალის თეატრში – დ. თემირიაევის „შურისმაძიებელი“, შემდეგ – მ. გუჩმაზოვის „მგლები“, მოლიერის „სკაპენის ოინები“, ნ. გოგოლის „ქორწინება“, ა. ცაგარლის „ხანუმა“ და სხვ. მასვე ეკუთვნის პიესები: „ბათას შვილები“, „აცამაზი“. კ-მა საზ. საწყისებზე სხვადასხვა დროს (1942, 1960) ცხინვალის თეატრთან დააარსა თეატრ. სტუდიები.
